

四庫全書

集部

欽定四庫全書

江湖小集卷五十

宋 陳起 編

黃文雷看雲小集

詩以唐體為工清麗婉約自有佳處或者乃病格力
之浸卑南塘先生為宜稍抑所長而兼進其短斯
殆名言若僕者江西人才分既以褊迫生世不諧
思致窘苦雖知其然而未之能變也芸居見索倒
篋出之料簡僅止此自昭君曲而上蓋嘗經先生

印正云

讀史感興

人為五行精二氣相循環陽明發天秀隱約超龍蟠如
何椒蘭芳苦厄蕭艾繁良玉必火浴利刃因崖剗大鈞
雖無垠嶽降亦甚難

空山有大木琅玕葉敷腴未至更摧落豈復潤朽株東
西四百載天明拱黃圖哀哀李杜死諸賢亦淪胥庸蜀
反初燃大廈終難扶長懷追典鳩誰復來此居

與午固薄德南風扇羣污癡兒各翻覆血刃起相屠老
羝作人語海上生羊魚山東二百州蒿艾生田間更擅
年代足文皇受乾符泰少否則長豈亦天意歟

斷鰲幾何年八極儼不動當是有樞紐鐵網落纖空偷
兒睨斗柄赤手掣天棟愁殺地上人覆壓萬古痛書生
見事淺十算九不中豈徒書生罪要與六籍共

子胡譏神仙仙人輕薄俗軒冕既非榮刀鋸況多辱惟
能小萬物是以超五欲栖瓊得輕安鏤玉記華馥一詠

太始音靈芝悟前夙小謫未可遺裁書繫鶴足

仙栖固多名世但知蓬萊九州復九州廣大莫可該
翩牧鶴童巧笑如嬰孩授我紫玄章歸路玉笛哀蒼寒
不可覓但有清風來偈仄寧久居浮生多塵埃

和陶

志士方進身恨不以羽飛東縛歸山岡竟為人所悲
白楊夜蕭蕭顧此何足依百歲會有盡智愚同所歸
奈此後之人未老形已衰有酒不暇飲而恐心事違

林表有宿靄谷鳥相啾喧聽此心煩勞啟窻西南偏天
氣總未佳白雲生隴山欲訪雲間人雨至或未還撥灰
書且住首肯心中言

黃河一再清似是上古時風雅久已降後來無文辭清
風日淪落世道皆如茲工華不工實此話我所疑文章
有心印昔人端不欺但恨智者少吾亦少卑之

上有碧松林下有白石道中有學仙人自號古松老蛻
身千歲餘坐息如木槁面目劇嚴冷但道空虛好袖出

天甲書意色輕鴻寶此老誠可人吾欲從師表

牧牛上陽陂角掛上下經吳童歌且謠音趣皆混成東
西兩山間飽見日月更歸來松陰涼夕陽滿前庭黃葉
從風翻蕭颯草際鳴再拜謝天公賦此小人情

長歌行

君不見遊塵著空生九州人其中間懸兩眸楊花化萍
無根蒂風消水長東西流江南下濕人易老過盡歲年
還草草長留白日照人間榆柳浮生轉枯槁毳紋帶遶

千花黃青娥攢眉眉細長莫言一尊千萬壽乃翁身命
屬渠手長安城中鬼笑人水底紙錢能不朽今人不見
古人心古人不見今人事天上若無長生人即是古人
都盡死金鳬銀鴈滿江湖神光夜夜開黃壚年經月緯
三百卷平生欲作何人書古人去去留不得我思古人
三太息今人莫說山石牢更後十年人不識

觀化

屋角有蜘蛛結網大如箕有來者蜻蜓飛飛墮其圍嗟

汝水之生爬沙自足嬉忽然凌空遊蜂躉避路馳一朝
嬰禍羅羽翼安所施蜘蛛雖未出狼狽已可期我欲救
起汝正坐手足疲噫吁噫悲弗悲蜘蛛亦有黃雀隨百
蟲相殘人不管人兮食人天豈知

歲晚歸自臨川

半世生羣盜窮年見亂離出門偏念母挾策欲干誰
雪重人踪絕山寒火氣低平時來往地滿目盡憂疑

無恙

北去初無恙傳疑路不通戈鋌亭障密榜牘訓辭工落
日鳥飛急空山花自紅君為能詛盜桑已斗星中

題醉僧圖

僧之飲酒地獄咫尺此僧飲酒天龍辟易僧之飲酒背
面抵諱此僧飲酒口角咸沸披毛帶角即不理倒堦卧
路而已矣一生般若幾杯湯箇是逃禪真法子不憂兜
率不著渠只憂兜率無酒沽臨行自謗不羞恥至今留
與人畫圖畫圖得龍眠畫形兼畫意君看阿堵中如如

元不死是卧是死誰得知手中尚記攜鴟夷翻河倒海
不救渴安得餘瀝流於斯我觀此僧面孔真滑稽醉中
定解草聖并賦詩當其幕天席地時惜無人以筆墨隨
紛紛散聖今何為賴有一醉留其奇君不見夜雨閉門
難學柳下惠又不見背水置陣古來惟有韓將軍

南紀

南紀雷王澤涵濡已百年故應逢小劫何得怨蒼天舊
觀寧無日浮生自可憐永懷千古事感慨淚漣漣

南豐道中

此縣開天下披圖且萬家螭頭餘佛屋鹿角卧江沙好
與蘇凋瘵誰令息嘆嗟春風多少意殘竹映松花

此亦勸農者畬田半入雲龍蛇因爾雜玉石故難分天
地其如數江山未返魂茅茨倦行李何自戒重門

此路通南國予今人少行遺民依廟住曠野用鋤耕古
木刀痕熟空山鬼火驚猶聞宿師處倉猝又招兵

想見承平日茲為富庶鄉門庭存位置井臼隔垣牆草

市宜區種空村又夕陽誰歟真致此盜賊已天亡

天村三伯輩同此就天誅銳欲取禾耳那知暴骨乎雲
疑鵝鵲陣風想虎狼都掩骼行春令毋令長媚狐

曉行

一水來不極兩山青欲連夜雨瀑初漲曉雲路難緣此
寧有人跡四顧風竹喧渡橋復何歸倚崖桃初然

晚立

獨遊得荒蹊晚意與心會水聲遠纔聞山色靜可對鳥

語林塘邊犬吠籬落外柴門未須關月在東峰背

古石

長沙郡齋

巖扉窻前石參差類虎螭秋晴蘚可剝歲晏竹相宜要
自山川出那知陵谷移摩挲羣玉瘦風助馬王悲

石頭懷古

長江日浩浩跂予望淮南禹畫足廣輪王氣分歿函朝
市一以建蟠踞誠匪慚中躔胡塵悲六龍此停驂衣冠
幸有地喙息賴未殲豈惟時賢力要是天險參頗聞京

洛墟不救狐兔饞厭道故有道往悔寧非貪前登石頭
路得共北家譚新秋帶歸鴻落日隨征帆千古意未厭
鼓鐘已酣酣

金陵卽事

東庵遺像宿塵埃追想雞聲午夢回只與鍾山增九鼎
當時何似早歸來

千年陳迹故難尋向北山根識定林丘壑獨來差可意
斷無人影古松陰

唐晉諸人骨已磨龍蟠虎踞自山河可憐不共羊曇見
奈此秦淮落照何

王謝風流自一時長千古巷記烏衣尋常百姓幾番換
那有當年燕子飛

西域圖

大哉天地間品類不可齊誰為好事人貌此縣度西松
花瑣碎沙草肥是間可牧羊千蹄可憐羣鹿正走險或
爾剝割水其皮啜湏樹樺尚有理穴顙插齒吁何為吾

聞中原全盛時重譯解辯朝京師懷方象胥飭乃事幻
人詭伎何能竒煌煌烈祖鑒古作玉斧畫地分華夷羌
渾何者宅榮洛蠕蠕異類方紛披或為盤瓠孫或為天
狼妻冠帶之國盡羶麝玉門萬里那得知還君此畫雙
涕洟願賦周官王會詩

二橋圖

翔龍下卷江東土孫郎初得橋家女橋家本自重曹瞞
隻雞斗酒空酸楚衿情正用留阿瑜尚得人前稱肺腑

百年王氣意銷沉
妙寫丹青嬌欲語
香閨搦管寄何書
並蒂芙蓉按花譜
那知不是未嫁時
本末無從勘彤史
詞人多事管閑愁
銅雀紛紛底
歌舞儘教被髮向黃墟
只與東阿傳洛浦

昭君行

自石季倫始賦昭君曲
以後作者浸多不容
措手每恨沿襲之悞
作漢初和親意著詠
非也又按竟寧元年
呼韓邪既壻漢氏其
年五

月宮車晏駕矣因併除之不惟祛詞人之失
亦以解昭君於地下云

君不見未央前殿羅九賓漢皇南面呼韓臣無人作歌
繼大雅至今遺恨悲昭君丙殿春閑鬪馮傳掖庭新花
隔煙霧粟姚枉奪燕支山玉顏竟上羶車去人生流落
那得知不應畫史嫌蛾眉癡心只恐琵琶語歸夢空隨
鴻鴈飛穹廬隨分薄梳洗世間禍福還相倚上流厭人
能幾時後來驚啄皇孫死野狐落中高臺傾宮人斜邊

曲時平千秋萬歲總如此誰似青塚年年青

次黃存之東臯韻

藝木東臯下新榮冒水涯錦機分箔開青子亞枝斜攢
角初生笋龍鬚正引瓜汲清雙玉井留客品嘗茶
抱膝東臯下春風又草廬海仙將可見溪友未宜疎
著祈年疏閑箋種樹書西山類煙雨容易長嘉蔬
負耒東臯下溝塍稻秫分汙耶爭一溉臺笠事重耘
雅春稱壽秦謳歲勞勤無功虛作傳農績未如君

挾冊東皋下從人笑未玄傳真秧馬帖參透牧牛篇列
岫窻前月平湖塢外煙似蒙稽古力鍾鼎豈其然

冬郊

冬郊見初晴空林夕陽軟歸牛無人驅欲涉行轉緩新

藁明屋山失喜鵲爭喚絕勝門外人流冗及歲亂

楚語
歲晏

為亂

送故

履霜著餘悲送故或古風幸會草木長土脈驗隱隆共

惟青鳥仙倘亦知吾窮落日起秀色軍峯在雲中

上天池寺

蟠際均衡嶽千峯獨出羣鯤鵬從水擊翼軫驗天文曠
野風行雨曾霄日貫雲僧言興廢事因念福王勲
始從平地望宛在九霄中不意身能到平生心併空江
淮通好雨日月會剛風三伏涼如水蟠拏想白龍
今古無窮恨山林只自豪雲行地欲盡風立天相高靈
草如堪餌浮生計可逃人間何擾擾萬里一秋毫

往年因讀岳王傳嘗為之賦今過東林睹其遺
像感而申頌之

將軍英爽冠人豪眼底山河累寶刀青女護香天亦悞
黑龍飲渭數何逃當時僧說松楸犯今日人推閭閻高
珍重王孫方鼎貴莫將歌舞替征袍

欲壞長城豈自由江人重唱白符鳩熏天富貴還須盡
從古忠良類若讎獄吏但能書牘背相公終欲割鴻溝
書生志念閑無用長想朱雲地下遊

近報

入春風雨惡情懷
談柄誰資近報來
比歲時聞通國信
新年又說建行臺
難言鐵冶飛灰燼
易見銅駝出草萊
羌筦夜吹梅落盡
倚牆繚亂野花開

青青塞草始知春
又見平林棗頰頰
虵起天津流枉矢
鳥飛淮甸覆行塵
漆城按堵寧辭蔭
石馬霑溝會有神
千古睢陽無處覓
不知臧質是何人

玉壺即事

雨過條風著柳芽淡黃淺綠嫩如花陂湖漾漾初侵路
蜂燕紛紛各理家帶郭園林仙苑近送春船舫繡簾遮
芸窗倦倚何山翠暖靄輕籠日脚斜

自廣

今古紛紛孰控搏太平方寸豁憂端後千年去人何似
外九州來天自寬風雨南山飛霹靂江湖北斗掛闌干
安知元命真消息滄海神龍自屈蟠

次陳剛父見簡韻

我居深山中細哦求友篇解后湖海賓得此壁一聯山
立古先民期君能拍肩茫茫宇宙心楚楚東南賢


讀書知姓名心死非貌敬昭回不在小中天揭西柄空
山三木榻綠滿風雨徑歲寒毋忘我細意匡山詠
呦呦革野春我友二三子歸山睡初足澗壑秋風起一
辦無盡香黃雲繞書几別吟極雋永形魂清九耳

挽程孺人

汪起潛內

有煒遵彤管無嫌各紫樞清心能敏悟雅性謝驕舒奉

誥期鸞彩傳經囑鳳雛妙年仙格迅琬琰不勝書



江湖小集卷五十

欽定四庫全書

集部

江湖小集卷五十一至

詳校官中書_臣張杓成

助教_臣常循覆勘

覆校官主事_臣龔敬身

校對官助教_臣胡予襄

謄錄貢生_臣苗序洙

謄錄監生_臣謝承蔭

欽定四庫全書

江湖小集卷五十一

宋 陳起 編

姚鑄雪蓬稿

予自壯喜學文而苦於拙澀雖才氣有定稟亦根本
薄故枝葉踈既謫衡杜門省咎之外稍盡力於聖經
言傳若有所覺取舊稿讀之大有愧焉將畀烈炬有
類鷄肋者因為一編以識予愧他日苟能勉進於道
斯亦不足觀也已端平二年歲乙未

詩

春日書懷

柔風散原野百草搖春心叢薄曜陽彩嚶鳴調好音節
物一以變萬感集素襟玄髮不常居華景無停陰胡為
苦貧賤征塵翳瑤簪萱葉覆堂階荆花感晴林明當理
星駕歸息清溪潯

雜詩

北風日以勁古道無人行陽坡樹已黃陰崖草猶青四

時相代謝誰為此枯榮攬衣坐幽磴下有流泉聲聽之
不成調挹之有餘清悠悠京洛塵汚人頭上纓

春館

山館四無隣東風伴幽寂瓶花羞晚紅庭草銜春碧猿
攀松樹枝鶴踏蒼苔色麾之不肯去聽讀麻衣易

見趙章泉

秉芳獨向章泉老四海兒童以字傳特詔難更高士服
好詩多入賈人船行寓冷落熙寧後放鶴風流景祐前

一代典刑能幾見
願從几杖閱耆年

見袁蒙齋

書說曾傳到刻中
不圖今見古人風
間生伊洛二三子
安得龔黃十數公
仁性未嘗離日用
道心元自與人同
絜齋衣鉢慈湖學
願發精微一啟蒙

懷雲泉願山老

枯吟世慮輕求道
不求名病起春風
過閑居野草生游
山尋舊屐煮藥試
新鑄別久空相憶
疎鐘隔水鳴

寄徑山敬溪翁

心遠人間世燈傳國一禪
靜中無劇暑詩外總閑年
掛錫雲生樹烹茶月落泉
幾時歸去得再約剡溪船

拜先君墓

次第瞻山看水流夜臺中
闕憶三秋新松成行如人長
老鶴無言似我愁僧奉晨昏
惟茗供兒悲霜露只頻羞
結廬終歲關心事悵悵鐘聲
出暝樓

送曄冲晦歸天竺

西湖山下多奇石師去今遊乳竇峯遙想石臺登講罷
野猿歸洞鶴歸松

寓雪川

王戴溪頭小隱仙漁翁引上雪溪船幾回倦釣思歸去
又為蘋花住一年

春夜曲

金魚鑲合蘭缸小酒不支愁尋睡早梨花欲墜風更寒
燕子不歸春自老流蘇護帳香雲結三十六箒清吹咽

緘書欲寄湘水深城鳥啼落花西月

夜發漁浦

為親從薄宦不復計修程
斷浦迎潮別孤帆帶月行
秋來江柳變夜久水煙生
前路猶淹泊淒其賦遠征

桐廬道中

兩岸山如簇中流鑠翠微
風颿逆水上江鶴背人飛
野廟青楓樹人家白板扉
嚴陵臺下過不敢浣塵衣

頭陀菴

衣緇髮可梳雲外卓菴居佛換新花供幡拈古偈書刪
松容徑竹種茗間園諫為應諸方供山房盡日虛

出山

雲陰漠漠雨瀟瀟坐兀歸與埜興遙石礧水流苔路滑
竹籬秋去菊花焦誰將束緼求山火自立寒谿問板橋
官事奔奔何日了倚松臨水羨漁樵

題畫壁

兩山灌木帶晴鷗泯泯春流漾浦沙隔岸小舟呼不應

碧桃花外是誰家

寄范中洲

高隱就詩名中洲雅趣成
几前修竹淨屋上落泉鳴
圉春風織山田野火耕滿
山薇蕨老客至足蔬萌

野廟

未知何王廟歲月日已非
熏爐松柏煤畫壁苔蘚衣
門空牧豎戲樹老山魃依
田家社酒香紙窖生光輝

懷范正夫

愁霖滴禾黍秋暮滯雲莊但慮輸井稅不憂無積倉竹
鷄啼野塹饑鼠走山房不飲論文酒思君覺夜長

宿護國寺觀晦翁先生題名

滿樹櫻花滿逕松解鞍纔是暝樓鐘上方月白山雲靜
看見東南一兩峯

看了題名看跋文自憐不及晦翁門野僧惜打殘碑賣
時共山猿洗墨痕

寄沖晦

欲答前春信西飛鴈不逢應隨丹竈鶴同看白雲松花
雨繚經石山鳴出定鐘何時尋舊住却說武夷峯

訪中洲

踏雨來敲柳下門荷香清透紫綃裙相逢未暇論奇字
先向水邊看白雲

賃宅

及春遊帝里賃宅似吾家雨雷生新草風牀受落花病
多添老懶慮澹遠紛華時與幽人遇燒香煮茗芽

悼復石壁

一死雖如蛻殺身真可哀僧危能仗義詩好更多才鶴
怨蘭亭月雲消石壁苔舊時同社友寂寞載書來

送僧

去結茅堂雪水邊曉行持鉢落花天得錢未用栽松本
先買溪南舊石田

王別駕訪天竺願暉二師

寶香熏徹碧蓮臺別駕尋僧日暮回聽雨齋前驚樹長

浴雲池上看花開青山久不逢坡老玄鶴親曾識辨才
二老風流如昨日百年詩石未蒼苔

廬陵贈異孤峯

幾度雲間望鶴飛相逢猶喜及秋期明朝採藥青原洞
好掬寒泉供祖師

寄劉敏叔

一生貧樂鬢成絲前輩風流及見之道外無營偏愛畫
靜中有趣只吟詩雲生茅屋湖山近秋滿荒園橘柚垂

見說地幽人罕到自同妻子種江蘿

自青原回訪敏叔幾不相遇

曉汲三泉洗硯回要看奇石立蒼苔騎驢應為尋詩出
放鶴還知有客來一井清寒宜茗飲千林黃落獨梅開
他時老圃如能學只乞山中橘本栽

寄趙東野時以帥檄撫定贛叛

東野山人有晉風歸來三徑自栽松錦囊句好閑中趣
鈎鼎丹成靜處功無事杖藜隨野鶴有時隱几看晴峯

長江近日風波惡莫向深淵下釣筒

清晨閣上鬱孤臺鼓咽譙樓角更哀病葉滿山難獨掃
狂花一樹為誰開泉枯石井獅空吼雨暗荒池鳳不來
欲向江東問仙老海風吹浪駕舟回

送贛士謁前贛侯楊東山

凝香句滿空同石靜向東山卧白雲夫子自能明易學
衆人誰解識玄文空江短棹浮詩卷別岸飛花撲練裙
到得帶園春已過煮茶應共竹間分

題東山贈何青霞詩後

青霞道士來相見手閱東山詩一卷句裏明知山水心
筆端照見煙霞面昨宵夢上寥陽殿仙官敕作青霞傳
傳成不及卷中詩罰讀靈歌三百遍

午興

心閑日日理黃庭四體和柔勝藥靈獨步小軒無一事
老槐陰裏鶴梳翎

雜著

核齋銘

青原陳義以核名齋敬菴姚鏞為銘其義銘曰

是核雖微中有太極散一於萬歛萬於一元亨利貞根
條花實實中有元生生不息反觀我心有如此核廣而
充之碩果不食旦而伐之害仁曰賊敬之敬之以種厥
德

存齋箴

人之一心均具此性動而為情因物而應彼枯亡者斧

斤之勝而助長者握苗之病必有事焉勿忘勿正敢告
心官常持以敬

冰壺說

唐梁國公作冰壺賦以厲當官者舊萬安令
李東揭而名縣之西齋鏞朝夕處冰壺之下
知誠不在目而在心也遂為之說曰

人之一身宰之者心凡身之動皆心之形大哉此心至
靈至神至明至清天地自此位日月自此明四時自此

運鬼神自此靈萬物自此生一徇乎意則昏昏濁濁不能如鑑之澄天地日月鬼神皆為之不寧四時萬物又烏乎有成無怪此身為物所撓夫惟克己復禮閑邪存誠不汨乎本靈本神本明本清而後此身表裏自然如玉壺之冰故曰嗜欲將至有開必先天降時雨山川出雲

修政和縣西山道院記

縣距四百步有舍人山清溪橫前怪石如龜蛇狀蟠伏

湍流中令袁君采奇之即其麓初道院中設真武像余始至眎其屋污敗而弗幔視其垣頽圯而弗全視其途巖險而弗可扳竊病之他日過之污敗者飭而丹青頽圯者築而憲楹巖險者甃而階陞異之問所為道士張思立揖于旁曰是邑人鄭君洽孫也思立聞長老言昔驛道徑山上院降一等雲遊之屨滿戶外自路徙院下涉層級而上之日以凋寂如病之不瘳已二十年邑之人未嘗過而問今鄭君方妙年能不愛其力起精神於

期月間其勇於鄉善者乎世蓋有席厚貲靳靳然計秋
毫雖骨肉若不相識者亦有不寶金玉而寶聲色棄美
利田宅如棄敝屣者語及為善望望而去之若將浼焉
鄭君不猶愈乎余喜道士之言旨也因志于壁善鄭以
勸來者

程太中祠堂記

顓有太中程公祠紹定六年始也寶元康定間公嘗宰
屬邑之興國其政事其言行有家傳在不復論著獨取

其壽斯道之脈者表而祠之初公倅南安濂溪周子為
理掾不為守所知公獨知其為有道者俾二子學焉明
道伊川先生也天之將興斯文也固必有以啟之然其
道心之存目力之異加於三遷之教一等矣蓋自孟子
歿邪說行志功利者舞權謀談性命者溺佛老天理民
彝晦而不明羣聖人傳心之統絕而不續周子生於千
四百年之後超然神會而心得之原理與氣以窮造化
之精微本誠與幾以明知行之根抵衆人固不識也微

太中周子之蘊孰發之微周子二程先生之學孰傳之
今而晦者明絕者續天下後世知有堯舜禹湯文武周
公孔子孟軻之道不至泯滅者推本而論太中公有功
於斯道不其盛歟學者既知敬事周程三先生則思所
以敬事太中公者宜若宗之有祖矣贛實公舊游地而
崇祀無所非所以昭有功開來學也間嘗語之教授畢
允升與邦之人士咸謂闕典乃即學宮立先生祠崇像
設位與濂溪並俾邦之人士游於學拜於祠趯然有動

於中為人父者知所以隆師而慕道為人子者知所以親師而學道詳味乎周程之書邈而求諸語孟六經之教沉潛涵泳如參點之在孔門此則立祠之本意也此又贛之人父師責也雖然是豈特有望於贛之人是年小至日郡守姚鏞

繼周壙記

繼周予庶子也紹定元年冬予官廬陵明年春予婦周氏卒冬繼周生故名曰繼周秀穎而健踰月能笑言立

予膝從予閱書人異之曰傳一經必此子是年寇起江
湘州縣騷動弟鑛攜繼周歸葬周氏于剡又明年予蒙
恩為令迎安輿就養繼周偕焉至杭得驚疾死于玉山
道中嗟乎吾見汝之歸而不見汝之來也壽天天耶比
歲老弱壯穉死於盜賊者幾千百人世之奔走於名利
旅而歿者幾千萬人繼周生兵間甫一歲非有役於利
名也以予故往來數千里其亦幸而不死於盜賊其亦
不幸而歿於旅也天耶余年將四十而鰥不能靜退保

此子以續先人之祀祀誰續耶周氏誰繼耶人謂傳經者夢耶鑛舟其骨來萬安予不忍客之也歸藏於周氏墓下其生己丑十月四日其卒庚寅十一月六日其葬辛卯十二月十日予剡溪姚鏞希聲也銘曰天生之耶胡不予之壽夭死之耶胡為予之秀嗚呼豈其秀故弗壽

題蔡九峯洪範內篇後

易以象顯範以數推自然之理也河洛呈文至於今幾

千歲易之象雖已著而範之數無傳焉非無傳也不知而作者晦之也九峯先生獨能闡神禹不傳之秘分一於萬該萬於一天地事物之變古今興亡之幾性命道德之蘊皆不逃乎一九八十一之間體用一源顯微無間妙乎其擬諸易也惜也不壽而數之辭未備豈天亦靳此書之全耶後世有子雲必能補之嘗觀啟蒙極筮三書實與是篇相表裏西山真先生表公墓謂不愧父師之傳諒哉晚學小子輒不自揆併刊於章貢郡齋與

學者共之

題戴石屏詩卷後

詩盛於唐極盛於開元天寶間昭僖以後則氣索矣世
變使然可與識者道也式之詩天然不費斧鑿處大似
高三十五輩使生遇少陵必將有佳句法如何之問晚
唐諸子當讓一頭

題孔明抱膝長嘯圖

俗工圖孔明抱膝長嘯者類多髯而巾九雲殊不知九

雲乃征南蠻後之巾也按孔明事昭烈相後主凡二十六年而隕星之變乃五十四則抱膝長嘯正年二十四五時少年英槩如此司馬德操目之伏龍鳳雛諒哉

題畫卷

蘭幽潔而孤芳木輪囷而壽考此君子所以不願人知靜養以樂天之道

上古守范計院啟

勢難養寇甘罹專殺之辜事有從權迄被至公之貸本

非得已夫復何尤伏念某謾學字人粗期行志見惡如
去草必使其絕根焉治民猶牧羊豈容有敗羣者矧此
萬安之邑控於諸峒之衝厥有渠魁久為巨蠹人不堪
命莫保室廬之安天誘其衷俾離巢穴之險蛇如不斷
蔓恐難圖遂行國人皆曰殺之言不暇士師則可以之
問彼何人者欲有利耶詭捷報於郵筒飛謗書於牆壁
大府從而深詰微蹤因以自明向令天地之可誣寧免
春秋之責備茲蓋伏遇心知任理治豈求名以善變而

酌事物之情以能明而寬吏民之過念某務除民害固
難用法如平時知某非貪天功斷不殲人以無罪誨之
山判賜以海涵某敢不恪守官常益明仁術大事則從
其長焉有貳心為下而亂則刑更當三訊

賀人得郡啟

天好復還帝音渙寵在外十九年矣名亦隨之惟良二
千石乎階而升也已卜中留之近毋嫌外補之迂共惟
奎壁瑞星斗牛英氣胸次有不傳之學世間無未讀之

書直同太史一編相為名世未許晚唐諸子可與言詩
得失付之晏如富貴待其自至雖然野服若無意於人
間不道除書已相尋於門外惟桐川之千里尚瓜戍之
二霜上方興久不見之思公豈待來何暮之詠須知捷
徑由此假途人謂令狐了綸坡之事業世期安石收棊
墅之勲名某側聽郵傳不知屐折昔曾對月同歌招隱
之詩今慶逢時請上得賢之頌

謝薦啟

斐章冒進敢覲賞音薦墨遽騰略無難色喜斯文之有
脈信凡骨之能仙伏念某隱吏為貧嗜書成癖黃卷對
聖賢何暇語耶苦吟逢公卿皆不覺也一編持以印可
八字慨然品題學有源流漢唐人所罕到文稱雅健籍
湜輩恐未能譽其過情榮不蓋媿茲蓋伏遇踐履至熟
權衡不欺察吏於澄按之間不動聲色取人於言辭之
末如見肺肝遂令狂簡之徒獲與吹揚之數某敢不若
金斯礪期玉于成道之將行今幸逢於先達學而時習

尚期到於古人

通交代康尉啟

雪舟入興厭披黃綬之塵丹鼎迎仙喜動青雲

闕

締好襞楮請期共惟識老

闕

才充以學

闕

有郢中

之集散作和聲居多

闕

之賢習聞

闕

矧能濟美宜

顯為官

最爾闕

和勞哉吏隱

闕

不嫌於噲伍我徒媿於

盧前人意喜新蚤望渡關之氣天心留瑞佇符飛

鵬闕

某破硯謾將雕弓亦敝而今全璧所望匿瑕如鷺寄

巢待涼風而徑去有龜負印指吉日以相傳

江湖小集卷五十一

欽定四庫全書

江湖小集卷五十二

宋 陳起 編

俞桂漁溪詩藁

雨吟

輕輕烟霧失樓臺
雨暗吳山鎖不開
試與漁翁閒訪問
落花幾許泛溪來

過湖

舟移別岸水紋開
日暖風香正落梅
山色濛濛橫畫軸

白鷗飛處帶詩來

和葉廣文韻

入得春來物物饒
翻思湖上短長橋
去年寒食閒遊處
曾把扁舟繫柳條

書齋

野草沿庭砌清閒
日掩扉晚涼疎
雨過落葉覺蟬稀
天籟自鳴竹砧聲
誰擣衣僧寮不過此
何必叩玄機

閔名勝詩集

買得山房數冊詩倚蓬細讀已移時只貪眼底看冰玉
月上荷花更不知

書懷

僻性止耽書村中謾寓居心惟求事省身合與名踈木
葉秋風起蛩吟夜雨初吾生今晚矣不必問何如

閨怨

鳳幃曉起鬢鬆鬆枕肉初生酒暈紅一把柳絲挪在手

沉吟無語對東風

沉吟一作尋思

誰憐人去鎖朱樓終日憑欄只帶愁燕子也知人薄倖
飛來略不傍簾鉤

溪流

雲腳纔行復又開一聲隱隱只空雷家僮忽報溪流漲
知是前村落雨來

初秋

火老金柔暑告殘乘涼正好望西山秋聲來處無尋覓
只在窻前竹葉間

雜興

漫山花發草萋萋楊柳飛綿水拍堤
況是客懷禁不得
那堪杜宇耳邊啼

偶吟

降伏吾心法無如去外魔
苦吟詩愈拙着意字猶訛
荏苒青衫舊消磨白髮多不才為世棄徒自詠卷阿

雨中遣愁

花已開時人正愁
花簪頭上使人羞
一春可厭無晴日

下却珠簾懶凭樓

清明

朝來閣雨喜新晴
枝上鶯蠻調好聲
佳節莫將虛過了
人生贏得幾清明

即事

陰雲釀雨勒花遲
梅已飄殘到杏枝
好是池塘清夢處
勾吟春草入新詩

松江

荷葉翻風暑氣微
看山露冷濕征衣
垂虹夜靜三高月
只照漁溪一舸歸

惜春

春事三分過二分
桃花水上覓紅雲
遊人浪說春歸去
柳外黃鸝尚自吟

次吳秋潭韻

相逢款話傍簷西
坎止流行事不齊
君到白蘋秋正好
飽吟風月棹前溪

東山

東山隨分作生涯，即是清高隱者家。
粗有小園供日陟，不愁無地種梅花。

夏中即事

重梅過了，猶慳雨。幸有南薰在翠槐。
燕子亦於貧者薄，今年全不見飛來。

延祥觀

御園猶自有逋梅，約束遊人莫肯開。
聽得老兵談舊事，

幾年不見翠華來

虎丘

兩寺今為一因秦虎占丘鶴飛王劍化鳥宿古墳愁石
與泉流接池通海水浮十奇多勝槩不及盡追遊

家園

眺望西山在目中更須寬展竹籬通殘梅尚守清廉節
不嫁東君昨夜風

首夏

槐幄陰陰蔽綠扉池抽荷葉落薔薇梁間紫燕新雛弱
來傍簷前旋學飛

偶成

短髮蕭蕭滿鏡秋家居但覺歲時流兩年不見西湖面
笑我寒盟是白鷗

月夜

江南又見雁初飛楓葉蕭蕭踈旋覺稀邊塞戍夫天氣冷
誰家月夜搥征衣

裴墳

買船寄僻徑墳古最幽深山近風常冷松蟠晝亦陰來
時無速騎歸路有鳴禽寄語城居者何人肯訪尋

山中

剖竹相通澗下泉更邀山色在樽前一鉤明月軒牕上
欹枕藤牀獨自眠

惠山

徑入松關古秋雲帶樹烟只疑山有雨恰是澗流泉騷

客詩留壁遊人岸繫船憑誰招陸羽淪茗古欄邊

秋懷

喚醒歸舟是早秋水光雲影兩悠悠西風不管梧桐怨
一葉吹來一葉愁

農事

東作農家處處忙金珠非是療飢方京華只識笙歌樂
豈識男耕與女桑

甘露寺

占斷淮南勢西風入鬢毛一江流不盡多景最為高斜
日迷烟樹孤帆送客舫興懷人物少今古等秋毫

夏晨偶作

蠶事行將了農家刈麥初雨慳林少笋水溢港無魚因
病嘗懲酒偷閒懶答書今年身愈老事事覺全疎

贈雲間陸琴士

地僻居閒絕可人殷勤過我抱桐君聲中知有遼天鶴
彈散華亭一片雲

烟霞石壁

山深入翠微寺僻掩幽扉景別金仙地人忘塵世機
石滋崖雨滴龍出洞雲飛結屋同僧處何須賦式微

久雨

踰月留京國春光總不知可傷連夜雨好似暮秋時
有客來無酒逢人只說詩官中聞閉糴應是細民飢

次坦菴兄韻

便中蒙賜墨得句勝如書暫爾兩年別俄然春暮餘夢

馳情不間心邇跡何疎
自省吾今老湖山縛屋居

豫章滕閣

滕閣昔曾遊今無檻外樓
遠山連樹合盡日對江流
古石空存記騷人易感愁
夜深歌酒處燈火燦漁舟

寄書

歲月遂巡笑故吾
人生南北隔江湖
樓頭約取衡陽雁
寄得一行書信無

江湖小集卷五十二

欽定四庫全書

江湖小集卷五十三

宋 陳起 編

俞桂漁溪詩藁

冷泉亭

步入侵雲嶺亭高路恰平池邊幽樹古水底細沙明無
友詩難詠逢僧話轉清此中真勝地林寂鳥無聲

夏晝

輕搖羽扇着輕紗閒汲清泉自煮茶綠是夏來無甚雨

小池猶未有荷花

楓橋寺

湖水相連月照天
雁聲嘹唳攪人眠
昔年曾到楓橋宿
石岸旁邊繫小舡

秋千

吾今兩鬢已成絲
每每逢春獨自悲
最恨秋千無力上
風流不比少年時

早春

客裏匆匆二月春梅花開後柳爭新西湖不待清明到
早有尋芳拾翠人

寄懷

一番舊事總成空莫使相思夢裏逢惆悵陽臺雲共雨
陽臺今隔幾千重

夏中即事

青青梅子已添肥犢角新抽晚筍遲茶罷日長消睡處
案頭一卷樂天詩

看先叔祖青松居士倉使詩

儒冠每笑拙身謀
春日因何桂玉留
南浦未思芳草恨
西湖正為落梅愁
四靈去矣今如在
諸老蕭然事已休
衣鉢青松誰繼續
家雞還復可搜求

軍中請衣

諸營今日請春衣
積沓如山競捧歸
曾念雪中兵墮指
戍邊鐵甲正防圍

海棠

海棠嫋嫋弄胭脂雨入枝頭睡正宜最是高人有遺恨
杜陵因甚却無詩

居官

幸喜居官事不多空庭吏散雀堪羅近來轉覺詩朋少
誰肯高軒為我過

心事

落落功名鬢早斑蹉跎心事十年間看來只合歸湖上
漁釣叢中盡日閒

欽定四庫全書

江湖小集
卷五十三

三

垂虹

松江一景是虹橋欲約騷人釣巨鼉吳越封疆知幾夢
古今人物壯三高雪天斫鱸莎烟冷秋月漁歌劒氣豪
收拾琉璃千萬頃盡為醺醪汲波濤

臘八前四日

天氣晴和又作陰老來畏冷自難禁餘寒待伴留痕在
殊動騷人訪戴心

湖上閒步

一番雨過一番春
芒竹閒行踏軟塵
城裏不知春色早
湖邊楊柳已撩人

新竹

傍牆穿過鄰家竹
愛護新篁數十竿
翦伐莫令僮僕輩
老夫日日要來看

松江

香飄菡萏短篷中
水色山光一樣同
行止又非人所料
今年兩度上垂虹

虎丘

突兀浮圖插翠微
吳王事跡總成非
寺僧未晚山門閉
不放閒雲一片飛

秋詠

唵軸捲還開行歌興盡回
買花澆換葉開徑掃蒼苔巾
學涼紗樣衣從薄
苧裁潘郎羞鬢白多是為秋來

秋夜

秋夜多愁思
虛堂風露涼
觀書燈可近
欲睡漏初長
蛩

響頻催織螢飛爍有光雨梢牕外過散入稻花香

寄陳芸居

生長京華地衣冠東晉人書中塵不到筆下句通神江海知名日池塘幾夢春精神長似舊芸藁愈清新

冷泉亭

欲訪飛來景湖頭賃小船白雲侵嶺下翠樹傍泉邊入寺人須到深林影自圓山居相去近夜坐學參禪

春晚湖上

花事已成休都人懶出遊水添烟浪濶山帶夕陽愁柳
樹鳴黃鳥沙堤卧白鷗不辭歸路遠何必買扁舟

春詠

盡日看詩只掩扉出門細雨怕霑衣杏花已露胭脂色
燕子如何却未歸

苔錢

庭砌方圓出化均何須抵死論錢神貧家阿堵新添富
買斷西湖風月春

買魚

蘆花荷葉晚秋天
雁影橫斜遠水連
頻喚買魚人不應
偷忙撐入怕官船

即事

東君無處不繁華
一雨纔晴意便佳
客舍山梅開遍了
從今懶買擔頭花

送春

作惡情懷是別離
老夫懶作送春詩
東君歸去無蹤跡

試問垂楊便可知

春歸

青青結子在梅梢
方見春來夏已交
認得主人雙燕子
香泥啣去理新巢

晴天氣淑濃如酒
引得狂蜂路亦迷
獨立欄干凝望處
賣花人在畫橋西

閒中

花飛春減燕雛飛
葉葉成陰障翠圍
囊裏酒錢消鑠盡

滿船贏得載詩歸

江頭

漁浦山邊白鷺飛
西興渡口夕陽微
等閒更上層樓望
貪看江潮不肯歸

口占

園林綠暗又紅稀
蜀鳥啼山笋蕨肥
春夏一番交篆早
綿衣脫了着單衣

吟詩

漁溪僻好只吟詩此意還須識者知自古島郊貧徹骨
詩逢窮處始為奇

社日

今朝社日寒猶力燕子還尋五柳家
牢肉不沾吾分薄
強斟醵酒度年華

喜雨上別大參

爰立為霖仰望深今朝一雨慰蒼生
經綸久簡君心在
燮理還同天道亨
愛國慮勤寬玉帶
籌邊謀遠捍金城

我公勲業難模寫但見皇家慶太平

寓京二首

一官落笑如初只合空山去讀書不稼不漁無活計
謾將名氏玷公車

車馬滔滔厭軟紅湖邊秋意屬西風木犀初放荷花老
買箇船兒學釣翁

春日即事

春入侯家春事深日長庭院又沉沉客中不耐如絲雨

攪起思家寸寸心

春光滿目是吳頭水碧琉璃拍岸流憶着去年桃葉渡
相思無限使人愁

丙午七夕後一日晚抵松江塔下

到得垂虹迫暮烟前村雨暗莫行船幸然得與僧人熟
借得終宵客位眠

客中情況少人知正值鐘聲約束時清坐更無人共話
挑燈來看菊潭詩

江湖小集卷五十三

欽定四庫全書

江湖小集卷五十四

宋 陳起 編

俞桂漁溪乙藁

江上

江頭雲閣雨柳色與春深
船發春風阻誰知客子心

居閒

富貴人所願貧賤不堪憂
自有蘭蕙清非比蕭艾羞
功名如露草飄瓦若虛舟
千載儻相遇臯夔及伊周
苟使

窮未達一壑營一邱出處謹吾節斯心已細籌

古意

無言情脉脉美人久相隔道阻修且長春草幾番碧鳳
釵冷鬢雲鸞鏡輕雲暮昔為比翼鳥今作孤飛翮愁絕
寄郎衣腰瘦裁宜窄

春日即事

羲馭舒徐日正遲園林已覺杏花稀半晴半雨春無準
燕怯輕寒不耐飛

薄薄輕輕寒露雨
微微颯颯早秋風
小舟辦了松江去
占取三高作釣翁

賞月

天淨無一雲
地淨無一塵
十六月圓滿皎皎
白玉輪
古今同此月
照破世間人
夜久方浴出
露坐風滿襟
清影入窗戶
聊足慰我心
所欠一樽酒
所乏一張琴
如此好月色
惜乎在海濱
癡兒官事了
空自疲精神
不得賞新月
酬酢相與頻
今宵詩興動
狂吟漁溪民
獨對猶復爾

況逢親共賓

採蓮曲

盡艇將歸笑語頻
鴛鴦對對起還沉
妾心先自懷郎苦
怕嚼蓮心苦轉深

靈隱

回首得兩年
曾入靈隱去
一路看不足
衣露松上露
白雲來相迎
澗泉飛瀑素
此景天下無
遠勝廬山路

種竹

門前槐已長庭內草自生所欠園中竹多種渠幾莖此
君真可愛非獨王猷情有時吟詠暇入園得閒行所幸
筍萌出次第陰可成更使神宇爽漸覺眼界清最是秋
雨夜風來

闕

春暮寄友人

日煖梨花雪風吹楊柳綿春踰三月半夢憶十年前詩
借鶯聲和書無雁字傳東君還似舊吾鬢嘆皤然

即事

吹落楊花春事了
小池新綠雨添痕
育蠶時節寒猶在
村落人家半掩門

初夏

薔薇花已謝
芍藥擬下坡
午陰有嘉樹
景序猶清和
日得詩篇詠
門無俗客過
笋胎今歲少
荷葉小池多
春去餘旬日
夏雲已蹉跎
我吾年嗟老矣
身事笑蹉跎
但欲卧白石
幽巖捫青蘿
已與心料理
不必問如何

次下竺僧韻

朝市軟紅塵山林氣味深
放懷隨野鶴過耳任春禽
石澗鳴泉玉松釵墜日陰
隱居無箇事存養讀書心

江上

小雨纔收日漸斜酒旗插處兩三家
江頭粧點秋來景半是蘆花半蓼花

秋日

芙蓉未折桂香浮落日西風雁過樓
一雨空階深夜滴十分秋是十分愁

偶成

吹來一葉報秋知
玉露金風正及時
戴了涼巾披野服
桂花香裏看唐詩

秋行吟

西風緊兮葉脫枝
寒露濃兮菊繞籬
蘆花白兮蓼滿湄
雁聲急兮蛩轉悲
樂吾淞兮殊興思
况東淮兮落遠陲
朝氣肅兮夜漏遲
暮雲黯兮山色衰
紛紛眯目黃埃吹
艱關千里徒驅馳
窮猿投林任所之
膏粱諸公那得知

從今休被微官縛未若琴歌詩酒樂豈無手足懷我情
當念行人多寂寞

習氣

習氣於詩却未除儘教人笑治生疎功夫若到窮吟地
雖是居貧富不如

即事

暑赫練襟汗欲流倩誰喚得一天秋無人共訂吟邊句
獨有蟬聲叫樹頭

平湖

平湖一景堪圖畫
舟子烟波去復歸
舊日元真無覓處
西山長見鷺鷥飛

半塘

因訪雲巖過半塘
清明時候野花香
小舟趁雨衝風去
不及尋僧到上方

送人至松江

西風蕭瑟入船窗
送客離愁酒滿缸
要記此時分袂處

暮烟細雨過松江

雨後

雨後新晴日轉西
桑間猶有拙鳩啼
十分愁意無人管
紅蓼黃蘆水滿溪

紀愁

可笑無詩紀四愁
強將歡伯解吾憂
夜長明月紗窗冷
分得寒蛩一半秋

和樂天初夏韻

雨脚來山岫溪痕漲岸沙
插旗多酒戶掛網盡漁家
地出綳兒笋園收菜子花
春歸鷺鷥嬾風急燕飛斜
孟瀉青荷葉甌煎白玉茶
孤村流水晚數點有歸鴉

述已

落落功名鬢久斑重遊京國又何顏
早知寸祿榮家晚悔不當初便入山

釣臺

不愛三公漢祿榮一絲風月許多清
只將節義高千古

豈釣人間利共名

七夕有懷

擘釵情緒思悠悠
月下穿針嬾傍樓
非獨雙星惜離別
人間天上一般愁

秋夜

月華如水淨無塵
千里相思總一心
絡緯籬邊吟不徹
做成秋意十分深

賡宋雪巖韻

詩與梅花一樣清江湖久矣熟知名未容便理趨朝計
行見相留入幕榮照座精神澄玉宇當官才及壓金城
星郎況是曾知己刮目英游藻鑑明

南蹌跹上人之平江

青浦相逢恰二年今宵再會亦前緣詩囊和月橫挑去
穩泛楓橋夜半船

夏日遣懷

老大今無用吟詩了白頭百年如電影萬事付沙鷗性

淡偏宜靜居貧動是愁人情難似舊門外水長流

寓歸

水激長江浪風傳遠寺鐘宦情秋意薄歸興客愁濃捲箔迎新雁喧籬厭舊蛩何時旋故里載酒插芙蓉

性拙

性拙難為巧年來險屢經身閒詩謾賦心靜夢能靈當貴如朝露英雄幾曉星尋思世間事日影過中庭

秋日即事

宿有騷人興休教世俗知郊墟聊晚眺風月入秋宜愁
極惟憑酒囊空却剩詩更長人不睡燈火可親時

論詩

大道本無體何在文字間易從先天畫詩自聖人刪流
風傳益遠後作莫可攀推敲誰氏子一字不可閒

江湖小集卷五十四